

## 2 Pita

### Yän-yäkñarani äma täño man jopi yäpä-siwon takta manbiñam

<sup>1</sup> Man ñowä Saimon-Pita näkä kudän täyat. Näk Jesu Kristo täño watä epän äma ba aposoro kubä. Täñkañ ämawebe nadäkinik nintä yäpmäñ kuñat takamäñ udegän yäpmäñ kuñat takañ inta yäñpäñ man ño kudän täyat. Nadäkinik yäyat uwä nadäkinik Anutunin ba waki keriken nanik nimagurani Jesu Kristo unitäño täktäk siwonj terak yäpumäño u. Nadäkiniknin u imaka jopi nämo, unita iyp takinik tak takamäñ. <sup>2\*</sup> Täñpäkañ Anutu ba Ekäninin Jesu Kristo unitäño manbiñam danipäñ yäñpäñ-nadäk täñ irirä unitäño orakoraki ba bänep pidämtä inken tokñek-inik pat tamik täyon.

#### *Ninä Anututä inita iwoyäñpäñ nipmañkuk*

<sup>3</sup> \* Jesu Anutu ude itkañ kehäromini inipärik kubä unitä kehäromi nimin moreñirän irit kehäromita biñam itta, ba kudän Anututä ini gäripi nadäk täyak u täñpen kuñatta nadäk kädet ätuta wäyäkñenañi nämo. Ude kuñatneta mebärini käbop nämo penkañ wäpi biñam penyänek ikek kwawak niwonärenkuk. Uterak, ba ninta yäñpäñ epän säkgämän kubä täñkuko uterak inita biñam yäñpäbä nipmañkuk. <sup>4</sup> Ude täñkuko uwä imaka säkgämän-inik, gwäki ärowani nimikta yänkehärom tañkuko u nimin kuko ubayäñ. Täñirän iron uterak

---

\* 1:2: Jud 2      \* 1:3: 1Pi 2:9

kome täño nadəñ gärip ba kañgärip waki äma täño bänepi täñpänwak täkañ u täga irepmitpäñ bänep nadäk-nadäkjin Anutu täño ude bumik äworek täyak.

<sup>5</sup> Mebäri unitagän kudän siwoñi mebäri mebäri yäpurärätpäñ yäpurärätpäñ täñpäñ kuñat täkot. Nadäkinikjin nitek itkañ kudän siwoñi pewä ahäwäpäñ kañ kuñarut. Täñkañ kudän siwoñi terak kuñatpäñ kudän siwoñi Anututä gärip nadäk täyak unita yäñpäñ-nadäk täk täkot. <sup>6</sup>\* Ude täñkañ irit kuñat-kuñatjinta watäni itkañ bäräpi gänañ gwäk pimiñpäñ kuñat täkot. Ude täñkañ Anututä iniken kudän siwoñi u iñitpäñ ini bumikgän kuñat täkot. <sup>7</sup> Ude täñpäñ notjiye kowat nadəñ imän täñpäñ iron kädet bureni pewä ahäk täyon. <sup>8</sup> Kudän udewani koreñpäñ yäpmäñ kuñatneñ. Yäpmäñ kuñarirä tañi tokñenayəñ täkañ uwä eruk nadäk Jesu Kristoken nanik yäpuño uwä jopi nämo api täñpek. Nämo, u irit kuñat-kuñatjinken bureni ahəñ bumbum api täneñ.

<sup>9</sup> Täñ, äma kubätä kudän siwoñi udewani nämo yäpmäñ kuñarayəñ täko uwä Anututä kädet ude kañ iwarut yəñ niwet täyak u nämo nadəwän tumbani yəñ iwetne. U äma dapuri tumbani ba dapuri waki ude bumik. U momini biani ärutpak täwani unita guñ täyak. <sup>10</sup> Eruk not-naye, in äma udewani nämo äworeneñ. Nämo, Anututä inita biñam iwoyəñpäñ tämagutkuko unita gwäk pimiñpäñ iniken äbot itta epäni kehäromi täneñ. Ude tänayəñ täño uyaku nadäkinikjin nämo pewä putärewäpäñ täñyabäk-ken nämo api mäneñ.

---

\* 1:6: Gal 5:22-23

11 Kädet ude terak Anututä Ekäninin ba waki keriken nanik nimagurani ämanin Jesu Kristo täño kañiwat yewani paot-paori nämo u gänañ ärokta api taniñ kirewek.

*Anutu täño man u bureni*

12 \* Notnaye, man u nadäkañ. Ba Anutu täño man buramiñpäñ yäpmäñ kuñat täkañ u bureni-inik yäñ nadäñpäñ kehäromigän inñit täkañ. Upäñkañ näk intä man u täñguñ takta gäripi nämo nadätat. Unita yäñpäñ kadäni kadäni pen api täwet täñpet. 13 \* Node kañ täñpa yäñ nadätat; Nämo kumäñkañ irayäñ täyat ude bänep nadäk-nadäkjin äneñi täñpidäm takta man u wari wari pen api täwet täñpet. 14 \* U imata, näkä kumäkta kadäni keräp täyak yäñ nadätat, Ekäninin Jesu Kristotä näwetkuko ude. 15 Unita näk inken täwetpäñ täwoñärek epän kehäromi täñpayäñ. Ude täñpayäñ täro uyaku kumäñirawä man täwetpäñ täwoñärek tak täyat u juku piñpäñ api yäpmäñ kuñatneñ.

16 \* In nadäkañ; Ekäninin Jesu Kristotä kehäromi nikek äbayäñ täyak unitäño manbiñam uku täwetpäñ täwoñärek täñ yäpmäñ äbumäño uwä äma täño kobap manpäñ nämo täwetkumäñ. Nämoinik, dapunintä Anutu täño wäpi biñam penyäjek pähap ikek uterak ahäñirän bureni kañkumäño unita yäk takamäñ. 17 \* Nin kañpäñ nadäñjitna Anutu Nanintä orañ imiñpäñ wäpi biñam iniñ oretkuk. Täñkañ Anutu wäpi biñam säkgämän-inik, inipäräk kubä iranitä Jesu ñode iwerirän nadäñkumäñ; Ñowä

---

\* 1:12: Jud 5    \* 1:13: 2Pi 3:1    \* 1:14: 2Ko 5:1; Jon 21:18-19  
 \* 1:16: Mat 17:1-5    \* 1:17: Mat 17:5

nanakna bureni, näkŋaken bänepna gämäni-inik. Unita gäripi pähap nadäk täyat yäŋ yäŋkuk. <sup>18</sup> Man kotäk uwä, pom kudupi uterak iritna kunum gänaŋ naniktä äpäŋirän nadäŋkumäŋ.

<sup>19</sup> Ude kaŋpäŋ nadäŋkumäŋo unita man profet bianitä yäŋahäwani unita nadäkinik bureni täk tākamäŋ. Unita in imaka, manbiŋam u juku penpäŋ nadäŋpäŋ yäpmäŋ kuŋarirä api tägawek. Profet täŋo man u topän täŋo penyänektä bipmäŋ urani gänaŋ penyänek täyak ude. Topäntä ijiŋ yäpmäŋ kuŋtäyon kome yänek täyak udegän man unitä bänepjin-ken penyänen tamini yäpmäŋ kuŋtäyon guk pähap wäpi abäyänektä kaŋ ahäŋ tamän. <sup>20</sup> Täŋpākaŋ ŋodeta nadäkinik täŋput; Imaka kämi ahäкта yäwani profet bianitä yänkuŋo u iniken nadäk terak nämo yäŋahänkuŋ. <sup>21</sup> \* Nämo, profet man biani kubä ämatä iniken nadäk terak kubä nämoinik ahänkuk. Nämo, Kudupi Munapiktä bänepi täŋpidäm taŋ yämiŋirän Anututä man yämani u yäŋahänkuŋ.

## 2

### *Yäŋ-yäkŋarani ämata man*

<sup>1</sup> \* Bian profet jopi ätu Isrel ämawebe bämopj-ken itkuŋo udegän in bämopjin-ken api ahäneŋ. Ahänkaŋ Anutu wäpi terak jop manman, nadäkinik täŋpāwak man, u kábop kábop bämopjin-ken api yäŋahänjtän kuneŋ. Ba ugän nämo, Ekäni ärowani suwanpäŋ yämagutkuko unita imaka, mäde api ut imineŋ. Ude tänayän täŋo unita Anututä bäränjek-inik api täŋpän waneŋ. <sup>2</sup> Täŋpākaŋ äma mäyaptä

\* **1:21:** 2Ti 3:16; 1Pi 1:11      \* **2:1:** Mat 24:11; Jud 4

unitäno kädet kuroŋ iwatpäŋ kudän ämatä nämo tänaŋi u api täneŋ. Täŋirä äma nadäkinik nämo täŋpanitä yabäŋpäŋ man bureni täŋo kädet unita yäŋpäŋ-yabäŋ yäwat api täneŋ. <sup>3</sup> \* Täŋpakan äma jopman yäwani unitä monenŋta yabäŋgärip täŋkaŋ Anutu wäpi terak kobap man mebäri mebäri yäŋ-täkŋarirä monenŋ api yämineŋ. Ude tänayäŋ täkaŋ upäŋkaŋ yäpmäŋ daniwani ämatä manken yepmakta kadäni bian peŋ yämiŋkuko unita itsämäŋtak. Ba yäpmäŋ daniwani ämatä täŋpäwak täŋpayäŋ täko u täga nämo api irepmitneŋ.

<sup>4</sup> \* Unita imaka bian ahäwani täŋo manbiŋam ŋode täwera nadäwut; Bian aŋero ätutä waki täŋirä Anututä nämo yabäŋ koreŋkuk. Nämo, u geŋi waki, awaŋ bipmäŋ urani gänaŋ uken ureŋ täŋpän äpmonŋpäpän yen kehäromipän pädat täŋpän yepmaŋkuko kadäni pähapta itsämäŋkaŋ. <sup>5</sup> \* Ba udegän äma biani biani Anututa mäde ut imiŋirä nämo yabäŋ koreŋkuk. Nämo, yäŋirän umetä tokätpäŋ kudup däpuk. Täŋkaŋ Noa, Anutu iŋamiken siwoŋi irit kädet täŋo manbiŋam yäŋahäwani ukät iniken tawaŋken nanik <sup>7</sup> ugänpän täŋkentäŋ yämiŋpäŋ yepmaŋkuk. <sup>6</sup> \* Ba kubä pen ŋode; Anututä Sodom Gomora ämawebe yabäwän wawäpäŋ yotpärare yarä ukät ämawebe kudup kädäp pewän päŋku pat ijiwäpäŋ kädäkut äworeŋpeŋ kuŋkuŋ. Ude täŋkuko uwä ämawebe Anutu mäde ut imik täkaŋ unitä kaŋpäŋ ŋode nadäкта; Nintä terak udegän api ahäŋ nimek. <sup>7</sup> \* Täŋ, äma kubä wäpi Lot,

\* 2:3: Rom 16:18; 1Te 2:5      \* 2:4: Jud 6      \* 2:5: Stt 6-8, 8:18;  
2Pi 3:6      \* 2:6: Stt 19:24; Jud 7      \* 2:7: Stt 19:1-16

Sodom uken itkuko ugänpäj täñkentäj imiñkuk. Lot, äma täga uwä ämawebetä kädet kăbäñi-inik u täñirä yabäñkañ nadäñ bäräp täñkuk. <sup>8</sup> Ini uwä äma täga upäñkañ kepma kubäkubä ämawebe täño täktäki yäkyäki waki u yabäñpäj-nadäñkañ bänepi siwoñi-ken ägekot pähap nadäñkuk, ärowani kudän täk täñkuño unita.

<sup>9</sup> \* Eruk unita ñode nadäwut; Ekänitä iniken kudupi ämawebeniye täñyabäk mebäri mebäri-ken nanik täga täñkentäj yämiñpäj yämagut täyak. Täñ, ämawebe waki kädet iwatta gäripi nadäk täkañ u yabäñ yäwat itak. Yabäñ yäwat ittängän kowata yäpmäk-yäpmäk kadäni-ken kowata api yämek. <sup>10</sup> \* Bureni, äma kañgärip ba nadäñ gärip waki täñpäj kubokäret kädet ämatä nämo tänañi täk täkañ u, ba Anutu täño man iwatpäj gämori-ken kuñatta bitnäk täkañ uwä kowata yäpmäk-yäpmäk kadäni-ken täga nämo api irepmitneñ. Nämoinik!

Äma uwä äma jop manman yäwani bämopjin-ken itkañ u. U iniken gupi yäpmäj äronpäj iniken gärip ugän iwat täkañ. Täñkañ imaka wäpi biñam ikek kunum gänañ irani u yäñärok yäwetta umun kubä nämo täk täkañ. <sup>11</sup> \* Nadäkañ, añero, äma ude-wani yärepmit moreñpäj kehäromi nitek it täkañ upäñkañ Ekäni inamiken itkañ jop manman terak nämoinik yäniñ wärät täkañ. <sup>12</sup> \* U kawut! Profet jopi uwä imaka nämo nadäwä tärek täkañ unita man waki bumta yäk täkañ. U tom ägwäri bumik, nadäk-nadäki nämo. Tom ude, iniken gup täño gärip ugän iwaräntäk täkañ. Tom ämatä yabäñpäj

\* 2:9: 1Ko 10:13; Jud 6      \* 2:10: Jud 7-8,16      \* 2:11: Jud 9  
\* 2:12: Jud 10

däpmäkta yäwani udegän äma uwä paotta biñam täkta yäwani. <sup>13</sup> \* Uwä äma ätuta komi yämik täkañ kowata komi udegän api yäpneñ. Imaka unita gäripi nadäk täkañ uwä käbop nämo peñkañ kepma käroñ gäripini däpmäñ tärekta kudän waki mebäri mebäri wari wari täk täkañ. Ba inkät ketem bok täñnak täkañ unitä äñnak-äñnakjin uwä täñpewä imaka käbäñ täwani taräki ude äworek täkañ. Ude täñpəñ oretoret täk täkañ.

<sup>14</sup> Täñpəñ ugän nämo. U webe yabəngärip täñpəñ yäwarän täktagän nadäk täkañ. Momi täkta gäripi nadäk täkañ, u däpmäñ tärenañi nämo. Ude täñkañ ämawebe nadäkiniki kehäromi nämo ude-wani täñyäkñat-pewä momi täk täkañ. Täñkañ äma ätuta nämo nadäk täkañ. Nämoinik, initagän nadäkinik täñpəñ iniken gärip däpmäñ tärektagän nadəñpeñ kuñat täkañ. Unita Anututä api däpmäñ morewek. <sup>15</sup> \* Kädet siwoñita mäde ut imiñpəñ täñguñguñ täñtəñ kuñat täkañ. Uwä Beo täño nanaki wäpi Balam unitəño kädet kuroñ iwat täkañ. Balam uwä monenñta yəñpəñ kädet waki täkta gäripi nadəñkuk. <sup>16</sup> \* Ude täñtəñ kuñtäyon doñki, man nämo yäk täkañ upəñkañ doñki kubätä ämatä-yəñ man iwetpəñ Balam ñode kañ-yəñkuk; Täñguñguñ kädet täk täyan u kañ pe! yäk.

<sup>17</sup> \* Täñpəkañ profet jopi uwä ume dapuri kawuk täwani udewani. Ba gubam mänittä piññ äreyəñ täñpəñ jopjop kuk täkañ udewani. U täñkentäk kubä täga nämo täneñ. Unita äma udewanita Anututä yotpərare bipmäñ urani wakiinik kubä

\* 2:13: Jud 12 \* 2:15: Nam 22:7; Jud 11; Rev 2:14 \* 2:16:

Nam 22:28-35 \* 2:17: Jud 12-13

pen yämiņkuko uken api itneņ. <sup>18</sup> \* U gup yäpmäņ ärokärok man bumta yäņtāņ kuņat tākaņ. Tāņkaņ äbot tāņpani guņ äbot tāņo täktäk kädet waki apigān pewanipāņ täņyäkņat-pewä gup tāņo kaņgärip kädet mebäri mebäri äneņi iwat tākaņ. <sup>19</sup> \* U bānep ärik-ärik man ñode yäwet tākaņ; Nin niwarān tānayāņ tāņo uyaku säkgāmān-inik api itneņ. Ude yäk tākaņ upāņkaņ iniwä säkgāmān nāmo it tākaņ. Nāmo, u imaka täņpāwak ikek unita watä epān tāņ imik tākaņ. Unita ñode nadāwut; Imaka kubätä intäjukun tāņ gameko uwä, gäk unitāņo watä epān āmani jopi ude iren.

<sup>20</sup> \* Unita āma udewanita ñode yāwa nadāwut; Bian āma uwä waki keriken nanik nimagurani Ekāninin Jesu Kristo unita nadāņ imikinik tāņirä Jesutä tāņkentāņ yämiņpāņ kome terak waki täktäk kädet kudup yärepmitt moreņkuņ. Yärepmitt moreņkuņo upāņkaņ äneņi äyāņutpen kädet wakiken irirä unitä topmāņpāņ yepmāņitkuk. Eruk āma udewani uwä wakiken bian itkuņo u irepmittpāņ wakiinik-inik-ken itkaņ. <sup>21</sup> \* Unita kowata wakiinik yäpmäkta biņam. Pengān Jesu tāņo kädet siwoņita nāmo nadāwä tumbuņ yāwānāku tāga bumik itkāneņ. Upāņkaņ uwä kädet siwoņita nadāwä tumbuņopāņ äneņi äyāņutpen man kudupi yāwetpāņ yāwoņārewani u māde ut imiņkuņo unita kowata wakitä wakiinik api yāpneņ. <sup>22</sup> \* Kädet u tāņkuņo unita man kubä ñode kudān tāwani u bureni täyak; Aņtā aņek aņeņpāņ penkaņ äneņi nak tākaņ. Ba kubä pen ñode; But

\* 2:18: Jud 16 \* 2:19: Jon 8:34 \* 2:20: Mat 12:45 \* 2:21:

Luk 12:47-48 \* 2:22: Snd 26:11



kubä ume ärut iminpäŋ pewäkaŋ äneŋi kumaŋ päŋku okä näbä gänaŋ dumäk täkaŋ.

### 3

#### *Jesu bureni-inik api äbek*

<sup>1</sup> \* Notnaye tägagämän, bänepjin-ken nadäk siwoŋi pewä ahäkta man kudän intäjukun kudän täŋ tamiŋkuro ukät kubä ŋo man bian nadäwani u äneŋi yänkodak taŋpäŋ täwetat. <sup>2</sup> \* Imaka kämi ahänayäŋ täkaŋ profet kudupi bianitä yäwani unita äneŋi juku piwut yänpäŋ täwetat. Ba jukuman waki keriken nimagurani Ekäninintä aposoro meniken yänahäŋ tamiŋkuro unita guŋ täneŋ yänpäŋ man ŋo täwetat. <sup>3-4</sup> \* \* Täŋpäkaŋ imaka taŋi intä nadänaŋi u ŋode; Tärektärek kadäni keräp taŋirän ämatä iniken gärip iwatpäŋ sära man ŋode api yäneŋ; Äbäkta yänkuro u bureni de? Äbek oratä irä wawäpäŋ kumbuŋ-ken unitä päbä apiŋo itkamäŋ-ken imaka imaka kunum kenta kome ahänpäŋ irirän itkuŋo udegän itkaŋ ŋo yäk. Nämö api äbek! yän api yäneŋ. <sup>5</sup> \* Ude yäk täkaŋ uwä imaka bian ahänkuŋo unita guŋ taŋpäŋ ukeŋode yän yäk täkaŋ. Upänkaŋ bian imaka inidegän nämö itkuŋ. Anutu täŋo meni jinom terak kunum kenta kome ahänkumän. Täŋkaŋ Anututä yänpewän kometä ume gänaŋ nanik kwawak abänpäŋ ume bämopi-ken itkuk. <sup>6</sup> \* Täŋkukopäŋ mäden Anututä ini äneŋi yänirän ume tokŋepäŋ kome biani u kudup peŋ awähutkuk. <sup>7</sup> Eruk apiŋo kunum

\* **3:1:** 2Pi 1:13      \* **3:2:** Jud 17      \* **3:3-4:** 1Ti 4:1; Jud 18

\* **3:3-4:** Ais 5:19; Ese 12:22; Mat 24:48      \* **3:5:** Stt 1:6-9      \* **3:6:**

Stt 7:11-21; 2Pi 2:5

kenta kome udegän Anututä yänirän itkamän. U jop nämo itkamän, u kädäptä ijin paotta bijam itkamän. Yäpmän danik-danik kadäni-ken kunum kenta kome-kät ämawebe Anututa mäde ut imik täkañ u kudup api paot moreneñ.

<sup>8</sup> \* Unita notnaye tägagämän, imaka ñodeta nämo guñ täneñ; Ekänitä kadäni nämo danik täyak. Unitäño nadäk-nadäkken kepma kubä uwä obañ 1,000 ude bumik. Täñpäkañ obañ 1,000 uwä kepma kubä ude. <sup>9</sup> \* Kadäni nämo danik täyak unita ñode yänañi nämo; Api äbek yän yänkukopän bäräneñ nämo äbätak. Eruk bäräneñ nämo äbätak uwä mebäri ñodeta; Ekänitä äma ba webe kubätä paot-paotta bijam täkta gäripi nämo nadätak. Kuduptagän bänepi äyänutpäñ näkken äbut yänpäñ nadän tamiñkañ kwikinik itsämäñtak.

<sup>10</sup> \* Upänkañ Ekäni täño Kadäni u, iwantä äbäk täkañ ude, pit kubägän api ahäwek. Täñirän kunum mämä yänawat pit kubägän api paorek. Ba imaka imakani u gänañ itkañ u kädäptä api ijin morewek. Täñkañ kome ini ba imaka imakani u terak itkañ u kudup udegän api paotneñ. <sup>11</sup> Kädet ude terak imaka päke u kudup api paotneño unita in irit kuñat-kuñat kädet jidewani upän iwatneñ? Uwä ñode; Inäwä irit kuñat-kuñatjin kudup Anututa imiñ moreñpäñ kädet siwoñi, Anututä iniken ugänpäñ iwat täkot. <sup>12</sup> \* Kädet ude kuñatkañ Anutu täño kadäni pähaptä bäräneñ ahäwän yänkañ dapun käron täñpäñ itsämäñkot. Nadäkañ, kadäni ugän kunum api ijin paorek ba

\* 3:8: Sam 90:4 \* 3:9: Hab 2:3; 1Ti 2:4 \* 3:10: 1Te 5:2; Mat

24:29,35 \* 3:12: Ais 34:4

imaka imaka kunum terak itkaŋ u kudup api mutneŋ. <sup>13</sup> \* Upaŋkaŋ ninäwä imaka Anututä nimikta yäŋkehäromtak man yäŋkuko unita itsämäŋkamäŋ. Uwä kunum kenta kome kodaki, irit kuŋat-kuŋat kädet siwoŋitä tokneŋ pärekta yäwani u.

*Ket nadänpäŋ Ekänita itsämäŋkäna*

<sup>14</sup> Eruk notnaye, kadäni pähap unita itsämäŋit itsämäŋit Anutu iŋamiken momi nämo, siwoŋi kuŋatta gwäk pimiŋpäŋ kuŋat täkot. Täŋkaŋ Anutu-kät bänep kubägän itpäŋ kuŋatta epäni täk täkot. <sup>15</sup> \* Unita ket nadäwut; Anututä ämawebe bänepi äyänutpäŋ inita biŋam täkta unita yäŋpäŋ itsämäŋtak. Man u kudupi nämo. Anututä notninpak Polta man kädet u imiŋirän yäŋpäŋ kudän täŋpäŋ tamiŋkuko u udegän. <sup>16</sup> Poltä manbiŋam kubäkubä kudän täk täyak uwä man u nikekgän. Bureni, Pol täŋo manbiŋam ätu mebäri nadäna tumäkta pipiri täk täkamäŋ. Unita äma ätu bänep nadäk-nadäk kubägän nämo iŋirani, ba Anutu täŋo man burenita nämo nadäwä tumbanitä Pol täŋo man ätu yäpmäŋ äyänutpäŋ goret yäŋahäk täkaŋ, ba Anutu täŋo man ätuta täk täkaŋ udegän. Ude täk täkaŋ uwä paotta biŋam.

<sup>17</sup> \* Upaŋkaŋ notnaye, kudän udewani kämi api ahäwek yäŋ uku nadäk täkaŋ unita injinta ket nadänpäŋ kuŋat täkot. Täŋyäkŋarani äma, Anutu täŋo man täŋpäwawani unitä täŋ-täkŋarani täŋpäŋ man jopi täwerirä nadäkinikjin kehäromi u pewä putärewäpäŋ säkgämän itkaŋ u irepmiŋpäŋ

---

\* **3:13:** Ais 65:17; Ais 66:22; Rev 21:1,27      \* **3:15:** Rom 2:4; 2Pi 3:9      \* **3:17:** Mak 13:5,33; 1Ko 10:12

wakiken äpmonenṭa! 18 \* Tänpäkaṅ Jesu Kristo u Ekäninin ba waki keriken nanik nimagurani. Unitä orakoraki tamik täyak unitäno mebäri, ba iniken täktäkita yänpäṅ-nadäk tänpäṅ nadäwä tumbäpäṅ kehäromigän kaṅ irut. Tänpäkaṅ wäp biṅam ärowani, penjäṅek ikek ba iniṅoret man kudup Jesu Kristoken tärek-täreki nämo it yäpmäṅ kuk täyon. U bureni!

---

\* 3:18: Jud 25

**Anutu Täŋo Man**  
**The New Testament and portions of the Old Testament**  
**in the Tuma-Irumu Language of Papua New Guinea**  
**Nupela Testamen na sampela Olpela Testamen long**  
**long tokples Tuma-Irumu long Niugini**

copyright © 1997, 2011 Wycliffe Bible Translators, Inc.

Language: Tuma-Irumu

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

---

PDF generated using Haiola and XeLaTeX on 3 Mar 2023 from source files dated 9 Oct 2020

914cbf46-f59a-54d1-b209-0f763534edb5